

Ini Sa Keduwa Igsulat Denu Si SAMUWÉL

Ini Denu Sa Libelu 2 Samuwél

Na, tinulon diyà siini libelu sa denu si Datù Dabid, sa egoh di edung migkedatù diyà sa uwang tanà Huda, agulé migkedatù ma diyà sa langun tanà Islaél. Medoo sa binaelan i Dabid, duen sa egoh di tigtu egpigtuu diyà si Nemula owoy migpangunut ma, owoy egketuwan ma sa medoo etaw diyà kenagdi. Dodoo duen ma sa egoh di migbael salà enù ka egbaelan di sa hagdi daa ungayà. Agulé egoh sa tegesugkow kagi i Nemula si Natan migsigbolow si Dabid, tinulon i Dabid sa salà di owoy nesenulê ma apiya di pa hinaa di sa kepigtamay i Nemula kenagdi.

Na, endà langun di igsulat diyà sa kagi Menubù sa keduwa igsulat denu si Samuwél.

Ini Sa Egoh I Dabid Migkedatù Diyà Sa Uwang Tanà Huda

(2 Samuwél 2:1-7)

2 ¹Na, egoh di neubus dé iya wé nebaelan,^a mig-igsà Dabid i diyà si Datù Nemula, guwaen di, “Enù di ya amuk mangay a umugpà diyà sa sebaen menuwa diyà sa uwang tanà Huda?”

Migsagbì Datù Nemula i, guwaen di, “Hoò, ipanaw ka dé.”

Mig-igsà dema Dabid i, guwaen di, “Ngadan tayu di menuwa sa angayan ku?”

Migsagbì Nemula i, guwaen di, “Sa menuwa Hibelon.” ²Huenan di, mig-angay da diyà sa menuwa Hibelon Dabid i owoy sa duwa sawa di, si Ahinoam tegeHéslil owoy si Abigal sa nebalu diyà si Nabal tegeKalmél. ³Inuwit di ma sa medoo etaw di lapeg sa medoo malayan da, owoy mig-ugpà da diyà sa uwang menuwa Hibelon. ⁴Agulé mig-angay sa medoo

^a **2:1** Egoh i Dabid migdineg denu sa kinepatay da i Saulo si Honatan, sinegawan di kagda.

etaw tegeHuda diyà sa menuwa Hibelon. Egoh da migtebow, hinududan da lana sa ulu i Dabid anì tandaan da kagdi sa datù diyà sa uwang tanà Huda.

Na, egoh i Dabid migdineg denu sa medoo etaw tegeHabis diyà uwang tanà Galaad sa moglebeng si Saulo, ⁵migpeuwit kagi Dabid i diyà kenagda, guwaen di, “Ungayà ku metabangan i Datù Nemula kiyu danà yu migpehaa sa kehidu yu sa datù yu si Saulo egoh yu moglebeng kenagdi. ⁶Owoy ungayà ku ma hiduwan i Datù Nemula kiyu owoy ipetuu di ma sa igpasad di diyà keniyu. Na, mael a ma sa mepion diyà keniyu danà iya wé binaelan yu. ⁷Huenan di, pebagel yu dé sa pedu yu owoy petegas yu ma. Nematay dé Saulo i sa tapay datù yu, owoy hinududan sa medoo tegeHuda aken lana enù ka tinandaan da aken dé sa datù da.”

**Ini Sa Egoh I Dabid Migkedatù Diyà Sa Uwang
Tanà Islaél Owoy Sa Tanà Huda**

5 ¹Na, mig-angay sa langun umpungan tugod i Islaél diyà si Dabid dutu Hibelon dò.^b Egoh da migtebow, guwaen da, “Na kami, beken ké tiges a etaw diyà keniyu, dodoo sebaen daa sa depanug ta. ²Egoh anay egoh di si Saulo pelà sa datù ta, kuna sa mig-uwit sa medoo tegeIslaél amuk eg-angay da eggila. Owoy igpasad i Datù Nemula ma diyà keniko kuna sa umipat sa medoo etaw di tegeIslaél owoy kumedatù ka ma diyà kenagda.”

³Agulé egoh sa langun ulu-ulu tegeIslaél nesetipon diyà si Datù Dabid diyà sa menuwa Hibelon, duen sa nesesapadan binaelan da si Dabid diyà sa taengan i Datù Nemula, owoy hinududan da ma lana anì tandaan da kagdi dé sa datù diyà sa langun uwang tanà Islaél. ⁴Na, telu pulù gepalay dé sa kelukes i Dabid egoh di eg-edung migkedatù, owoy epat pulù gepalay sa lugay di datù. ⁵Dutu menuwa Hibelon dò sa kenà di eg-ugpà egoh di datù diyà sa uwang tanà Huda taman pitu gepalay owoy enem gebulan, agulé diyà Hébusalém sa kenà di eg-ugpà egoh di datù diyà sa langun tanà Islaél lapeg sa tanà Huda ma taman telu pulù owoy telu gepalay.

⁶Na, egoh i Dabid datù dé, inuwit di sa medoo sundalu di anì gilawen da sa medoo etaw Hébusiyo diyà sa menuwa Hébusalém. Pineumàumaan sa medoo etaw Hébusiyo Dabid i, guwaen da, “Endà mekeguseb yu dini, enù ka apiya langap owoy pikat daa sa pepelaguy keniyu.” Na, iya sa penemdem da endà mekeawuh Dabid i enù ka tigtu megamel sa kutà nekeulingut diyà sa menuwa da. ⁷Dodoo nekuwa i Dabid doo sa kutà menuwa Siyon. Huenan di, pinengadanan da menuwa i Dabid.

⁹Agulé mig-ugpà Dabid i diyà sa kutà menuwa Siyon, owoy pinengadanan di menuwa i Dabid. Pinelabel di sa menuwa anì melusud sa menuwa Milo owoy

^b 5:1 Egoh iya, pitu dé gepalay sa lugay i Dabid migkedatù diyà sa menuwa Hibelon.

inulingut di ma kutà. ¹⁰Neumanan sa kedatuan i Dabid enù ka si Datù Nemula épê dakel egkegaga sa eg-unut-unut diyà kenagdi.

Ini Sa Egoh Da I Dabid Migtaban Sa Medoo TegePilistiya

¹⁷Na, egoh sa medoo tegePilistiya neketiig datù dé Dabid i diyà sa uwang tanà Islaél, inangay sa medoo sundalu tegePilistiya egpengayaw. Dodoo egoh i Dabid neketiig iya wé egbaelan da, mig-angay eg-awuh diyà sa sebaen ma kutà di. ¹⁸Agulé migtebow sa medoo tegePilistiya diyà sa lepak Lépaïm, owoy tinepel da ma dé. ¹⁹Huenan di, mig-igsà Dabid i diyà si Datù Nemula,^c guwaen di, “Enù di ya amuk gilawen ku siini medoo tegePilistiya? Ipelugpì ko atu kagda diyà kenak?”

Migsagbì Datù Nemula i, guwaen di, “Hoò, angay ko dé kagda gila, owoy ipelugpì ku doo kagda diyà keniko.”

²⁰Huenan di, mig-angay Dabid i diyà sa Baal-Pélasim, owoy dahiya sa kenà di miglugpì sa medoo tegePilistiya. Agulé guwaen di, “Tigtu inatuwan i Datù Nemula sa medoo kuntelà ku, enù ka lagà da daa sa tanà inambak sa bekulud sa dakel memahà.” Huenan di, Baal-Pélasim sa kepengadan da iya wé kenà da.^d ²¹Na, egoh sa medoo tegePilistiya nekepelaguy, tinangtang da dahiya sa medoo inetaw egpenemulawen da. Agulé kinuwa i Dabid owoy sa medoo etaw di sa medoo inetaw.^e

²²Na, apiya di pa nelugpì dé sa medoo tegePilistiya, migpelikù da doo diyà sa lepak Lépaïm owoy egtepenen da dema. ²³Huenan di, mig-igsà dema Dabid i diyà si Datù Nemula. Hê, migsagbì Nemula i, guwaen di, “Yoko egdagseg duu denu isaluwan da, dodoo ukit yu polo diyà sa denu iyugan da owoy dagseg yu kagda diyà sa selatal siedò medoo kayu balsamo. ²⁴Angati yu dutu taman sa egoh yu dumineg sa éhê dagi sa medoo etaw egbigkat diyà sa pulu sa medoo kayu. Amuk dinegen yu iya wé, gebek yu dé kagda enù ka humuna a diyà keniyu, aken i Datù Nemula, anì melugpì yu sa medoo sundalu tegePilistiya.” ²⁵Na, pinangunutan i Dabid iya wé igsugù i Datù Nemula diyà kenagdi. Hê, tigtu linugpì da sa medoo tegePilistiya kedu diyà sa menuwa Gibayon taman diyà sa menuwa Gisél.

Ini Sa Egoh Da Mig-uwit Sa Baul Tandà Sa Igpasad I Nemula Dutu Hélusalém Dò

(2 Samuwél 6:1-12)

6 ¹Agulé sinetipon i Dabid dema sa langun mepion sundalu tegeIslaél hinemilì di. Telu lagsà sa kedoo da langun. ²Agulé inuwit di

^c 5:19 Mebaluy iya sa ukit di eg-igsà diyà si Nemula danà sa ulim eggamiten sa tegesimbà. Basa ko Éksodo 28:30; owoy Kebilang 27:21. ^d 5:20 Diyà sa kagi Hibelu, iya sa selepangan Baal-Pélasim si Datù Nemula sa mig-atu. ^e 5:21 Igsugù i Dabid anì ulowen da sa medoo inetaw kinuwa da (1 Kelonikas 14:12).

kagda eg-angay diyà sa menuwa Baalah diyà sa tanà Huda anì kuwaen da dahiya sa Baul Tandà sa Igpasad i Nemula. Na, danà siini Baul, egketulengan sa medoo tegeIslaél sa kedatuan i Datù Nemula épê dake egkegaga, enù ka lagà bangkù di sa sineteliwadaan sa duwa inetaw éhé palas egsugùsuguen i Nemula migtigdeg diyà sa tagpedan sagpeng di. ³Agulé kinuwa da iya wé Baul diyà sa dalesan i Abinadab diyà sa getan, owoy iglulan da diyà sa kalitun magtu binaelan. Duen sa duwa maama anak i Abinadab, si Usah owoy si Ahiyo sa eghahaa sa eg-uwit kalitun linulanan da sa Baul. ⁴Si Ahiyo sa eg-agak sa duwa sapi eggodoy sa kalitun linulanan da sa Baul. ⁵Na, si Datù Dabid owoy sa langun duma di tegeIslaél, egdelayaw da temù danà da neanggan. Ligò da egduyuy, egkebiten da ma sa medoo dalemetan da owoy duen ma sa medoo liyu dalemetan egbalbalen da.

⁶Na, egoh da nekeuma diyà sa atung kenà i Nakon eg-elik, nekebigkulek sa sapi eggodoy sa kalitun. Hê, sinabaan i Usah sa Baul Tandà sa Igpasad i Nemula anì endà menabù di. ⁷Agulé binulitan i Datù Nemula Usah i danà di migsabà sa Baul. Hê, petow dé minematay diyà sa dapag sa Baul Tandà sa Igpasad i Nemula enù ka pinigtamayan i Nemula.^f

⁸Agulé migbulit ma Dabid i danà i Datù Nemula migpigtamay si Usah, huenan di pinengadanan da Pélés-Usah iya wé kenà taman ini egoh di.^g ⁹Na, danà iya wé nebaelan egoh iya, migpesu Dabid i diyà si Datù Nemula, owoy guwaen di, “Ngadan sa ukit ku eg-uwit kéé ini i Baul Tandà sa Igpasad i Nemula?” ¹⁰Huenan di, endà dé egkeiyapan di duu eg-uwit sa Baul Tandà sa Igpasad i Nemula diyà sa menuwa di. Huenan di, igpeuwit di polo diyà sa dalesan i Obéd-Idom tegeGat. ¹¹Na, telu gebulan sa lugay sa Baul Tandà sa Igpasad i Nemula diyà sa dalesan i Obéd-Idom. Hê, netabangan i Datù Nemula kagdi owoy sa langun malayan di lugay sa Baul diyà kenagdi.

¹²Na, tinulonon da Datù Dabid i, guwaen da, “Tinabangan i Datù Nemula sa langun malayan i Obéd-Idom owoy sa langun egbaelan di ma danà sa Baul Tandà sa Igpasad i Nemula diyà kenagdi.” Huenan di, inangay i Dabid dema egkuwa sa Baul Tandà sa Igpasad i Nemula kedu diyà sa dalesan i Obéd-Idom. Egoh da eg-uwit diyà sa Menuwa i Dabid, sineoyongon da owoy tigtu neanggan sa medoo tegeIslaél.

^f 6:7 Duen sa uledin i Nemula diyà Kebilang 4:4-15 anì endà duen etaw egsabà sa Baul sa Tandà sa Igpasad i Nemula enù ka mapulù diyà sa kehaa i Nemula. Amuk ungayà da halien da, iya daa sa mebaluy umuwit sa medoo tegesimbà tugod i Lebi owoy seoyongon da. Nematay Usah i danà di endà migpangunut diyà sa uledin. ^g 6:8 Iya sa selepangan sa Pélés-Usah diyà sa kagi Hibelu si Usah nepigtamayan.

Ini Sa Egeh I Dabid Egkelukuy Egbael Sa Dalesan Simbaan Da

(2 Samuwél 7:1-3)

7 ¹Na, metanà dé sa keugpà i Dabid diyà sa metolol dalesan datù, owoy endà dé duen etaw eggila kenagdi danà sa ketabang i Datù Nemula kenagdi. ²Huenan di, mig-ikagi Dabid i diyà si Natan sa tegesugkow kagi i Nemula, guwaen di, “Taa ko, dahini a eg-ugpà diyà sa metolol dalesan linigoligowon sa papan anan kayu sidelo. Dodoo sa Baul Tandà sa Igpasad i Nemula diyà pelawà sa kemalig.”

³Migsagbi Natan i, guwaen di, “Mepion doo sa egkelukuyan ko egbael. Huenan di, baeli ko dé, enù ka netiigan ku eg-unut-unut Datù Nemula i diyà keniko.”

7:4-29 Na, apiya di pa iya sa egkelukuyan i Dabid egbaelan, endà doo ipetuu di duu, enù ka egoh iya wé sigep duen ma sa inikagi i Nemula diyà si Natan sa tegesugkow kagi di, guwaen di, “Angay ko tulon diyà si Dabid beken kagdi sa mekebael sa dalesan ku. Dodoo sa sebaen anak di polo sumetugdug kenagdi kumedatù sa mekebael.”

Hê, neketuu dé iya wé egoh i Salomon anak i Dabid migkedatù. Agulé pinengadanan da iya wé simbaan da Dalesan i Nemula.

Ini Sa Denu Si Dabid Owoy Si Batsiba

(2 Samuwél 11:1-17,26-27)

11 ¹Na, egoh di nelugaylugay dé sa egoh di neuma dema sa sebaen magtu palay sa mepion gai kesegilaway sa medoo datù, sinugù i Dabid dema Hoab i owoy sa medoo ulu-ulu sundalu owoy sa langun sundalu tegeIslaél anì mangay da gumila. Agulé linugpì da sa medoo tegeAmoniya owoy sineulingutan da ma sa menuwa Laba. Dodoo eg-ugpà daa Dabid i diyà sa menuwa Hélusalém.

²Na sebaen mahapun, migtudug Dabid i. Agulé egoh di mig-enaw, miggemow diyà sa mepatag atep sa metolol dalesan di owoy egbigkatbigkat dahiya. Hê, hinaa di sa bayi egpedigus tigtu metolol. ³Huenan di, mig-igsà anì metiigan di ngadan iya wé bayi. Agulé duen sa migtulon diyà kenagdi, guwaen di, “Si Batsiba atu anak i Iliyam, sa sawa i Uliyas tegeHétiyo.”

⁴Aglulé igpeangay i Dabid sa bayi, hê mig-angay ma doo sa bayi diyà si Dabid. Na, magtu daa neubus migpelanìh danà di migpangunut diyà sa uledin da denu sa egoh da egdepanugan adat bayi. Hê, neseuma da lawa si Dabid, agulé miglikù dé sa bayi. ⁵Na, danà iya wé binaelan da, migkelalingen Batsiba i owoy igpetulon di diyà si Dabid sa egoh di obol dé.

⁶Na, egoh i Dabid neketiig iya wé, pineuwitan di kagi Hoab i sa ulu-ulu sa medoo sundalu di anì pelikuen di Uliyas i tegeHétiyo sa sawa i Batsiba diyà sa

menuwa Hélusalém. ⁷Agulé egoh i Uliyas migtebow, inigsaan i Dabid, guwaen di, “Enù egoh sa egkebaelan i Hoab owoy sa langun sundalu ta?” Owoy inigsa di ma denu sa kegila da. ⁸Agulé mig-ikagi diyà si Uliyas, guwaen di, “Mepion doo amuk lumagbas ka pelawà diyà sa dalesan yu anì mekeetud-etud ka.” Huenan di, miglegkang Uliyas i. Hê, duen ma sa igpeuloy i Dabid igpelohot di diyà sa dalesan i Uliyas. ⁹Dodoo endà miglagbas Uliyas i diyà sa hagdi dalesan. Migtudug polo diyà sa bengawan sa metolol dalesan i Datù Dabid diyà sa atung kenà sa medoo tegebantay egtudug.

¹⁰Agulé egoh i Dabid neketiig endà miglagbas Uliyas i diyà sa dalesan di, inikagiyan di, guwaen di, “Magtu ka daa migtebow kedu mediyù dò, maen di ya endà eglagbas ka diyà sa dalesan yu?”

¹¹Migsagbì Uliyas i, guwaen di, “Sa Baul Tandà sa Igpasad i Nemula owoy sa medoo sundalu tegeIslaél owoy sa medoo sundalu tegeHuda, eg-ugpà da daa diyà sa medoo kemalig diyà sa kenà da eggila. Mediyù dalesan sa kenà da egtudug sa ulu-ulu ku si Hoab owoy sa langun sundalu ko. Enù di ya, mangay a pa diyà sa dalesan ku anì kumaen a owoy uminem a owoy anì mesehulid ké sa sawa ku? Egpengibet a diyà keniko owoy diyà sa kehaa i Nemula, endà doo baelan ku duu iya wé.”

¹²Agulé mig-ikagi Dabid i diyà si Uliyas, guwaen di, “Ugpà ka pelawà dini ini egoh di, enù ka peipanawen ku pa kuna simag.” Huenan di, mig-ugpà Uliyas i diyà Hélusalém egoh iya wé agdaw owoy taman simag.

¹³Inenggat i Dabid ma egkaen diyà sa kenà di owoy linangut di ma. Dodoo endà doo miglikù Uliyas i egoh iya wé sigep. Migtudug polo diyà siedò atung kenà sa medoo tegebantay egtudug.

¹⁴Agulé egoh di sumimag, sinulatan i Dabid Hoab i owoy igpeuwit di diyà si Uliyas. ¹⁵Iya sa igsulat di, guwaen di, “Pedenu ko Uliyas i diyà sa medoo mebalaw kuntelà yu, agulé peesud-esud ko sa medoo sundalu duma di anì meimatayan.”

¹⁶Huenan di, egoh da i Hoab eggila diyà sa menuwa Laba, pinedenu di Uliyas i diyà sa netiigan di mebalaw kuntelà da. ¹⁷Agulé egoh sa medoo kuntelà da miglaun kedu diyà sa menuwa da, egsegilaway da sa medoo sundalu i Hoab. Hê, duen medoo sundalu i Datù Dabid inimatayan da, lapeg si Uliyas.

²⁶Na, egoh i Batsiba migdineg denu sa kinapatay sa sawa di, sininegawan di. ²⁷Agulé egoh di migsabuh egdelawit, igpeangay i Dabid dé Batsiba i enù ka sawaen di. Agulé egoh di miglesut sa inobol di, maama sa anak di. Dodoo endà netuuwan Datù Nemula i diyà sa binaelan i Dabid.

Ini Sa Egoh I Dabid Nesenulé

(2 Samuwél 12:1-15a)

12 ¹Na, pineangay i Datù Nemula Natan i sa tegesugkow kagi di diyà si Dabid. Egoh di migtebow, mig-ikagi diyà si Dabid,

guwaen di, “Duen sa duwa maama eg-ugpà diyà sa sebaen daa menuwa. Kawasà sa sebaen owoy pubeli sa sebaen. ²Duen medoo kebilibili sa kawasà owoy medoo sapi ma. ³Dodoo sa pubeli, sebaen daa sa hagdi nati kebilibili bayi bineli di. Mepion sa keipat di lagà mendaa sa keipat di sa medoo anak di. Egsepipiyen di lagà sa bayi anak di owoy ipekaen di ma sa duma egkaenen di owoy peinemen di ma diyà sa hagdi tabù. ⁴Na, sebaen agdaw duen sa etaw kedu mediya dō migtebow diyà sa dalesan sa kawasà etaw. Dodoo endà egkeiyapan di duu egsumbali sa hagdi munoy hinagtay. Huenan di, iya polo sa kinuwa di sa kebilibili sa pubeli etaw owoy sinumbali di anì imengana di diyà sa etaw migtebow.”

⁵Na, egoh i Dabid migdineg iya wé, tigtu binulitan di sa kawasà etaw, owoy guwaen di diyà si Natan, “Ipengibet ku danà di melalù Datù Nemula i, mepion amuk meimatayan sa etaw migbael iya wé. ⁶Owoy pebayaden ta epat gulê metakep lagà sa kinuwa di, enù ka endà eghiduan di duu sa etaw pubeli.”

⁷Agulé mig-ikagi Natan i diyà si Dabid, guwaen di, “Kuna sa pineligadan ku sa kawasà etaw. Na, dineg ko sa kagi i Datù Nemula sa epgigtuuwen ta, kita i tugod i Islaél. Guwaen i Nemula diyà keniko, ginela di gaa kuna datù diyà sa medoo tegeIslaél, owoy inalukan di ma kuna kedu diyà sa egkegaga i Saulo. ⁸Owoy igbegay di ma diyà keniko sa kedatuan i Saulo owoy sa medoo sawa di. Kuna ma sa pinedatù i Nemula diyà sa uwang tanà Islaél owoy sa tanà Huda. Amuk kulang pa iya wé diyà keniko, dugangen di pa uman sa ibegay di diyà keniko. ⁹Huenan di, maen di ya endà sinagipà ko duu sa kagi i Datù Nemula danà ko migbael sa tigtu medaet diyà sa kehaa di? Igpeimatay ko polo Uliyas i owoy sinawa ko ma sa sawa di. Tuu doo, igpeimatay ko Uliyas i tegeHétiyo diyà sa medoo tegeAmoniya anì mekuwa ko sa sawa di. ¹⁰Na, danà ko gaa migtipay diyà si Nemula egoh ko migkuwa sa sawa i Uliyas tegeHétiyo anì sawaen ko, huenan di dumuen sa duma tugod ko tigbasen sundang mesetugdugtugdug taman melugay. ¹¹Peduenen i Nemula sa kumuntelà diyà keniko kedu doo diyà sa malayan ko. Hauwen ko sa egoh i Nemula kumuwa sa medoo sawa ko owoy ibegay di diyà sa duma ko nesesebaen menuwa owoy meseuma da lawa, apiya di pa agdaw. ¹²Iglidung ko sa salà binaelan ko, dodoo ipebael i Nemula ini i diyà agdaw anì mehaa sa langun tegeIslaél.”

¹³Agulé mig-ikagi Dabid i diyà si Natan, guwaen di, “Tuu doo, nesalà a diyà si Datù Nemula.”

Migsagbi Natan i, guwaen di, “Na, danà ko nesenulê, huenan di igpeuloy i Datù Nemula sa salà ko, owoy endà ma mematatay ka. ¹⁴Dodoo danà iya wé salà binaelan ko, sinumbung ko Datù Nemula i. Huenan di, mematatay iya wé anak yu.” ¹⁵Agulé miglikù Natan i.

Ini Sa Egoh Sa Anak I Dabid Nematay

(2 Samuwél 12:15b-24)

Na, igpetuu i Datù Nemula sa inikagi di. Huenan di, tigtu miglinadu iya wé anak i Dabid diyà sa tapay sawa i Uliyas. ¹⁶Agulé migsimbà Dabid i diyà si Nemula anì melikuan sa anak da eglinadu. Mig-eked ma egkaen owoy migdalem diyà sa bilik di dodoo uman sigep tanà polo sa kenà di eghibat taman umenaw simag. ¹⁷Agulé mig-angay sa medoo salu di diyà kenagdi anì petigdegen da, dodoo mig-eked owoy endà ma egpeunut di egkaen diyà kenagda.

¹⁸Na, egoh di neuma sa kepitu di agdaw, nematay dé sa batà. Dodoo egpesu sa medoo salu i Dabid egtulon diyà kenagdi denu sa batà nematay, enù ka guwaen da, “Amuk endà sinagipà di duu sa inikagi ta egoh sa batà nehagtay pelawà, labi pa egsagipà ini egoh di enù ka nematay dé sa batà. Petow ki daa mael medaet polo.”

¹⁹Na, egoh i Dabid eghaa sa medoo salu di egsebadàbadaay, iya sa pedu di nematay dé sa batà. Huenan di, inigsà di, guwaen di, “Enù di ya, nematay dé sa batà?”

Migsagbì da, guwaen da, “Hoò, nematay dé.”

²⁰Agulé mig-enaw Dabid i owoy mig-angay egpedigus owoy linulowon di lana sa lawa di owoy sinambian di ma sa ginis di. Agulé mig-angay egsimbà diyà sa atung kenà da egsimbà diyà si Datù Nemula. Egoh di neubus egsimbà, miglikù diatas owoy migpegeni egkaen. Hê, pinekaen da.

²¹Agulé mig-igsà sa medoo salu di, guwaen da, “Maen di ya hediya sa binaelan ko? Egoh sa batà nehagtay pelawà, mig-eked ka egkaen owoy sininegawan ko ma. Dodoo egoh di nematay dé, mig-enaw ka owoy migkaen ka polo.”

²²Migsagbì Dabid i, guwaen di, “Egoh sa batà eglinadu pelawà, mig-eked a egkaen owoy sininegawan ku ma, enù ka iya sa penemdem ku mehiduwan i Datù Nemula aken owoy anì melikuan iya wé anak ku. ²³Dodoo ini egoh di nematay dé. Maen di ya umeked a pelawà kumaen? Megaga ku pa ipelikù sa ginawa di, atu? Netiigan ku sebaen agdaw mekeangay a ma diyà sa kenà di, dodoo kagdi endà dé mekepelikù di diyà kenak, sumalà dé sa egkebaelan ku.”

²⁴Agulé pinepion i Dabid sa pedu sa sawa di si Batsiba. Agulé egkesehulid da dema, owoy migkelalingen dema iya wé sawa di. Hê, mig-anak maama owoy pinengadanan da si Salomon. Na, eghiduwan i Datù Nemula iya wé batà.